

AMPARO TABOADA GIL, secretaria xeral da Deputación Provincial da Coruña.

CERTIFICA: Que o PLENO DA CORPORACIÓN da Deputación Provincial de A Coruña, na sesión ordinaria celebrada o 30 de xuño de 2023, adoptou o seguinte acordo:

5. Aprobación da concesión dunha subvención nominativa á Universidade da Coruña para cofinanciar a "Programación cultural e de divulgación do coñecemento científico do ano 2023" e aprobación do correspondente convenio de colaboración.

1.- Aprobar a concesión dunha subvención nominativa por importe de 110.000 €, á Universidade da Coruña para cofinanciar a *Programación cultural e de divulgación do coñecemento científico para o ano 2023*, cun orzamento subvencionado de 137.500,00 €, de acordo co texto do convenio que se achega.

2.- Exceptuar para o presente convenio os principios de concorrencia, publicidade, igualdade e non discriminación na tramitación do presente expediente, dada a existencia de causas excepcionais que xustifican a concesión da subvención nominativa, por entender que se dan razóns suficientes de interese público no outorgamento da subvención. Estes principios atópanse recollidos nos artigos 22.2 da Lei xeral de subvencións e 65 a 67 do seu regulamento.

Coa motivación incorporada ao expediente e a proposta do Deputado de Cultura, levántase a nota de reparos emitida pola Intervención da Deputación no seu informe de 13 de xuño de 2023.

3.- Subordinar o presente acordo ao crédito que para o Exercicio de 2024, autorice o correspondente Orzamento.

" Convenio de colaboración entre a Deputación Provincial da Coruña e a Universidade da Coruña polo que se instrumenta unha subvención nominativa para o cofinanciamento da *Programación cultural e de divulgación do coñecemento científico do ano 2023*

Na Coruña, a

REÚNENSE

Don/a....., en representación da Deputación Provincial da Coruña.

Don/a....., en representación da Universidade da Coruña (en adiante UDC).

EXPOÑEN

Que a UDC é unha entidade de dereito público que ten atribuída por lei a prestación do servizo público de educación superior no ámbito territorial da provincia da Coruña, e de acordo co artigo 1º dos seus Estatutos, son funcións da universidade ao servizo da sociedade:

* A creación, desenvolvemento, transmisión e crítica da ciencia, da técnica e da cultura.

* A difusión, a valorización e a transferencia do coñecemento ao servizo da cultura, da calidade da vida e do desenvolvemento económico.

* A difusión do coñecemento e da cultura a través da extensión universitaria e da formación ao longo de toda a vida.

Que o Consello de Goberno desta Universidade, na súa sesión do 30 de marzo de 2023, aprobou a solicitude dunha subvención nominativa para o cofinanciamento entre a Deputación da Coruña e a UDC da programación cultural e de divulgación do coñecemento científico do ano 2023.

Que a UDC a través da Vicerreitoría de Igualdade, Cultura e Deporte, ten entre as súas funcións a promoción e a difusión entre a sociedade galega das actividades culturais e do coñecemento científico desenvolvido na Universidade, polo que vén promocionando dende hai tempo actividades de divulgación científica e cultural.

Que a comunidade da UDC, nos seus campus da Coruña e de Ferrol, goza dunha vida cultural dinámica grazas a unha programación de actividades singulares de carácter anual e cuatrimestral de ampla tipoloxía. Para alén de impulsar por medio desta oferta a creación de redes de implicación e participación entre todos os membros da comunidade universitaria, un dos obxectivos fundamentais da política cultural da UDC é acadar a participación do resto da sociedade a través de diversas accións culturais e científicas chegando, na medida do posible, a toda a provincia da Coruña.

Que a Deputación da Coruña ten entre os seus obxectivos o fomento da educación e a programación e subvención das actividades culturais, artísticas e científicas, en colaboración con outras entidades e organismos, para contribuír de maneira sustentable ao avance do coñecemento e ao benestar social.

Que a Deputación da Coruña e a UDC desexan formalizar a súa colaboración no ámbito da educación, a investigación, a transferencia do coñecemento, as actividades culturais, artísticas e científicas, nun novo convenio marco que favoreza o entendemento entre as partes e axilice os procesos.

En virtude do exposto, e dando cumprimento á vontade das entidades ás que respectivamente representan, os comparecentes outorgan neste acto o presente Convenio de Colaboración, e acordan formalizar o presente convenio que se rexe polas seguintes

CLÁUSULAS

I.- Obxecto.

O presente convenio ten por obxecto fixar as bases de outorgamento dunha subvención nominativa por esta Deputación a prol da Universidade da Coruña co NIF Q6550005J, fixando as condicións que se impoñen por esta administración concedente e os compromisos asumidos pola entidade beneficiaria para o financiamento parcial da **Programación cultural e de divulgación do coñecemento científico do ano 2023**.

O presente convenio contempla as seguintes liñas de actuación prioritarias, sen prexuízo de que ambas institucións, de mutuo acordo, contemplen outras que puidesen xurdir máis adiante.

Xornadas e premios divulgativos. Procúrase atinxir un duplo obxectivo a través destas actividades: achegar á sociedade os avances desenvolvidos desde a UDC no ámbito da investigación, así como motivar á mocidade – nomeadamente ás mozas– a realizar estudos superiores no ámbito científico.

First Lego League 2023. Trátase dun campionato que en 2023 se celebra por noveno ano no Campus Industrial de Ferrol. Nel participan varios centos de mozos e mozas de toda Galicia e pode seguirse tamén a través de YouTube. Trátase dun programa de ámbito internacional que desafía á mocidade de entre 4 e 16 anos (divididos en tres categorías) a resolver problemas do mundo real como poden ser a reciclaxe, a educación ou as enerxías renovables a través da ciencia e da tecnoloxía.

Obradoiros creativos. Os obradoiros ofertados inclúen diversos ámbitos da arte e da cultura e neste inicio de 2022 voltouse a unha impartición totalmente presencial, así como á duración habitual de 30 horas, cuestión solicitada polo alumnado nos formularios de avaliación dos obradoiros previos.

A participación nestes obradoiros permiten ao alumnado da UDC a obtención de créditos ECTS.

Obradoiros en NORMAL. Danza contemporánea, danzas urbanas, interpretación, fotografía orgánica, guiño cinematográfico, creación musical e novas tecnoloxías, obradoiro de escrita literaria.

Obradoiros co Centro Cultural Universitario do Campus de Esteiro. Danza contemporánea e caligrafía e lettering.

Aulas de Teatro e Danza. A actividade das Aulas de Teatro e Danza recuperouse no inicio do ano 2022; neste ano 2023 realizarase unha nova produción teatral e unha peza de danza que serán exhibidas no FITEUC (Festival Internacional de Teatro Universitario da Coruña), tanto na Coruña como en Ferrol, así como tamén noutros lugares da xeografía galega no marco dos diversos festivais universitarios dependentes das universidades de Santiago de Compostela (festival de Santiago e festival de Lugo) e de Vigo (festival de Ourense e de Vigo).

Clube de Lectura. Desde o pasado mes de novembro está a desenvolverse o Clube de Lectura de NORMAL baixo a coordinación da escritora Antía Yáñez, actividade que continuará ao longo do ano 2023. No clube participan vinte persoas pertencentes tanto á comunidade universitaria como á cidadanía en xeral, que se reúnen con carácter quincenal.

Residencias artísticas. Os diversos programas de residencias artísticas teñen como finalidade apoiar a artistas ou colectivos artísticos que desexen desenvolver un proxecto de investigación e/ou creación nos ámbitos das artes visuais, danza, música etc.

Estes programas pretenden ofrecer ás e aos artistas recursos materiais, técnicos e de infraestruturas para o correcto desenvolvemento dos seus proxectos, favorecendo tamén o intercambio entre artistas e disciplinas artísticas.

Residencia de creadores emerxentes “Interacción Artísticas en Galicia”. Este programa é froito dun convenio entre a Real Academia Galega de Belas Artes, os Conservatorios Superiores de Música da Coruña e de Vigo e as tres Universidades galegas, coa colaboración da Deputación da Coruña.

A residencia desenvólvese no Pazo de Mariñán a finais do mes de xuño e este ano está organizada pola Universidade da Coruña (a organización rota anualmente entre as tres universidades galegas).

Como en cada edición, participarán unha trintena de alumnos e alumnas do ámbito dos estudos artísticos das institucións citadas que desenvolven e presentan as súas propostas como punto de partida para unha creación conxunta e global, interdisciplinaria.

No caso concreto da Universidade da Coruña, participará alumnado da escola de Arquitectura e do itinerario de artes do Mestrado de Profesorado da Facultade de Ciencias da Educación.

Estas Interaccións Artísticas teñen unha segunda parte, a parte didáctica, que se realizará en setembro na Facultade de Ciencias da Educación da UDC.

III Convocatoria do Programa de Residencias Artísticas Normal – Fundación María José Jove Tras o éxito dos anos previos, coa recepción de máis de 200 solicitudes provenientes de toda Europa e de diversos países de América, convocaremos a III edición destas residencias artísticas, mediante as cales se proporcionará ás persoas seleccionadas o acceso a un espazo de traballo, acompañamento curatorial e recursos materiais e económicos para a produción de proxectos inéditos no ámbito das artes visuais.

Esta convocatoria está aberta a creadoras e creadores de calquera nacionalidade ou procedencia xeográfica e pretende:

- Promover a investigación, a creación e a produción artística.
- Contribuír a fortalecer o contexto cultural galego, promovendo proxectos creativos de interese social vinculados á comunidade.
- Configurar contornas favorables para o desenvolvemento do pensamento crítico e da arte asociadas a aspectos como a identidade patrimonial, a ecoloxía ou o medio ambiente.
- Facilitar un achegamento horizontal aos novos modos de inserción no territorio, de lectura e interpretación do espazo paisaxístico, natural e rural contemporáneo.
- Fomentar valores de protección e difusión do patrimonio natural e cultural de Galicia, a través da arte contemporánea.

Nesta ocasión convócanse dúas residencias, en lugar dunha, nas que a través deste convenio coa Fundación María José Jove, se proporcionará ás persoas seleccionadas o acceso a un espazo de traballo, acompañamento curatorial e recursos materiais e económicos para a produción de proxectos inéditos no ámbito das artes visuais.

Exposicións. A Sala de Exposicións de Normal é un espazo de máis de quíntos metros cadrados que ten acollido e acolle proxectos expositivos de grande interese e que dan cabida á mostra da obra de artistas emerxentes do noso ámbito xeográfico ou exposicións colectivas de diverso teor.

Neste ano 2023 están previstas dúas grandes exposicións mais é posible que antes do final do ano chegue a se realizar a montaxe dunha terceira. Todas as exposicións levan asociadas actividades complementarias, como visitas guiadas, conferencias, talleres etc.

Derrotas: formas de pensar, curada por Natalia Poncela e coa participación de Jacobo Bugarín, Silvia García, Carme Nogueira, Vicente Blanco e Salvador Cidrás

É un proxecto expositivo situado nas interseccións entre os campos da arte e da educación que analiza paradigmas establecidos sobre as ensinanzas e as prácticas artísticas; tamén plantexa unha ollada descolonizadora á propia historia do espazo no que se insire a Sala Normal, da institución pedagóxica da Escola de Mestras de Maxisterio da Coruña que definiron o propósito deste edificio, ofrecendo unha serie de achegas analíticas desde distintos campos de actuación: a creación, a educación, a docencia e a mediación artística. .

Ante a inminencia, de Rubén Santiago e comisariada por Pablo Fanego

Esta mostra plantexa unha posibilidade de percurso múltiple, unha deriva de narrativas que se superpoñen e entrecruzan nos mapas xeográficos, históricos e subxectivos da cidade da Coruña, e que neste proceso trazan conexións non necesariamente lineais entre dous puntos: a Sala Normal e o Castelo de San Antón.

unha *Ante a inminencia* artículase por volta de catro pezas: tres realizaranse especificamente para a mostra e cuarta presentará unha vía de diálogo entre estes novos traballos e as liñas de investigación que Rubén Santiago vén transitando nos últimos anos.

Publicación “A Galicia deseñada”

ata o Tras o éxito de público da exposición *A Galicia deseñada* que ocupou a sala de exposicións de Normal pasado 13 de xaneiro, este ano sairá do prelo unha ampla publicación sobre os símbolos, marcas e identidades gráficas de Galicia desde a Idade Media ata a actualidade.

Coro UDC. O coro da UDC ensaia dous días á semana e participa en numerosos actos académicos, así como tamén ofrece concertos tanto dentro como fóra da universidade.

O coro foi creado no ano 1990 e na actualidade está a enfocarse cara a un repertorio máis moderno e actual, o que fai que haxa moito alumnado interesado en facer parte del, nomeadamente alumnado Erasmus.

Actividades fixas e puntuais.

Letras Galegas
Roteiros singulares
Artes performativas e masterclasses
Ciclos de música

II.- Orzamento de gastos da actividade a realizar pola entidade beneficiaria.

Compras de bens destinados á actividade	6.889,89
Reparacións e conservación	1.200,00
Contratacións externas	91.689,60
Transportes	3.400,00
Primas seguros	820,51
Publicidade, propaganda e relacións públicas	1.000,00
Soldos e salarios e Seguridade Social	27.500,00
Axudas monetarias	3.000,00
Desprazamentos	2.000,00
Total	137.500,00 €

III.- Financiamento provincial e outros ingresos que se obteñan ou aporten para a mesma finalidade.

1.- A Deputación da Coruña contribuirá ao financiamento da actividade, tal como se define na cláusula primeira, cunha achega máxima de **110.000 €**, o que representa unha porcentaxe do **80 %** do orzamento total.

A contía restante, ata acadar o importe total do orzamento da actividade, está financiado con cargo a recursos, propios ou alleos, acreditando a UDC que ten consignado o crédito adecuado e suficiente para imputar a totalidade do gasto imputable á UDC.

No caso de que o gasto xustificado non acadase o importe total previsto na cláusula segunda, a Deputación só achegará o importe que represente o 80%, da cantidade efectivamente xustificada.

2.- Agora ben, se a cantidade xustificada resulta inferior ao 75% do orzamento previsto na cláusula segunda, entenderase que a finalidade básica da subvención non foi cumprida e perderase o dereito ao seu cobro.

3.- O importe do financiamento provincial farase efectivo con cargo á aplicación orzamentaria 0612/3269/ 45390 na que a Intervención provincial ten certificado que existe crédito dabondo sobre o que se ten contabilizado a correspondente retención de crédito.

5.- A subvención da Deputación é compatible coa percepción doutras subvencións ou axudas, públicas ou privadas, que a entidade beneficiaria obteña para a mesma finalidade, sempre que o seu importe, xuntamente co da subvención provincial, non supere en ningún caso o importe total do gasto efectivamente xustificado.

6.- No caso de que a concorrencia de axudas ou subvencións supere o importe do gasto efectivamente xustificado, minorarase a achega provincial no importe necesario para darlle estrito cumprimento ao apartado anterior.

IV.- Contratación e execución.

1.- O outorgamento dos contratos de servizos, asistencia ou subministracións necesarias para a execución da actividade corresponderalle á UDC, asumindo, xa que logo, as conseguíntes responsabilidades.

Non se poderá contratar a realización de prestacións con persoas ou entidades vinculadas á UDC, nin con calquera outra na que concorra algunha das circunstancias ás que se refire o artigo 29.7 da Lei 38/2003, do 17 de novembro, xeral de subvencións.

2.- Se o importe dalgunha das prestacións supera 15.000 €, con carácter previo á contratación, a UDC deberá solicitar polo menos tres orzamentos a distintos provedores; entre as ofertas recibidas, deberase elixir unha delas de acordo con criterios de eficiencia e economía, debendo xustificarse expresamente nunha memoria a elección cando non recaia sobre a oferta máis vantaxosa economicamente.

V.- Publicidade do financiamento provincial.

1.- Na publicidade pola que se dea a coñecer a realización das actividades da UDC, ben sexa por medios escritos, radiofónicos ou televisivos, audiovisuais ou internet, etc. deberase facer constar sempre o financiamento da Deputación Provincial da Coruña.

2.- Coa memoria e conta xustificativa achegaranse documentos que acrediten o cumprimento desta obriga da UDC.

VI.- A xustificación necesaria para recibir a achega provincial.

A achega da Deputación seralle abonada á UDC unha vez asinado o convenio e logo que se presente de xeito telemático a través da plataforma subtel, a seguinte documentación:

* **Memoria de actuación**, subscrita polo representante legal da UDC, xustificativa do cumprimento das condicións impostas neste convenio, coa indicación das actividades realizadas, dos beneficiarios e dos resultados obtidos.

* **Relación clasificada dos gastos** realizados (con IVE e sen IVE), no que se indiquen os acredores co seu NIF, os documentos xustificativos, os importes e, no seu caso, datas de pago; tamén se indicarán as desviacións con respecto ao orzamento detallado na cláusula segunda.

* **Certificación** da aprobación das facturas e demais documentos xustificativos polo órgano competente.

Os gastos e as correspondentes facturas referiránse exclusivamente ás actividades realizadas durante o ano 2023.

* **Relación** detallada das subvencións ou axudas obtidas doutras administracións públicas ou entidades privadas para o mesmo obxecto ou, pola contra, declaración de non telas.

* **Acreditación** do cumprimento das obrigas tributarias e coa Seguridade Social, segundo o previsto na cláusula oitava.

* **Acreditación** do cumprimento da obriga de facer constar a colaboración da Deputación en toda a información (impresa, informática ou audiovisual) que se teña feito das actividades subvencionadas, establecida na cláusula quinta.

VII. Termo para a realización da actividade e prazo de xustificación.

1.- As actividades que son obxecto de financiamento provincial, tal como están descritas na cláusula primeira, realizaranse entre o 1 de xaneiro e o 31 de decembro de 2023.

2.- Unha vez rematadas as actividades, a UDC deberá presentar a xustificación documental á que se refire a cláusula sexta antes do **31 de marzo de 2024**.

3.- De conformidade co disposto no artigo 70.3 do Regulamento da Lei de subvencións (Real decreto 887/2006, do 21 de xullo), transcorrido este derradeiro prazo sen que se teña recibido xustificación ningunha, a unidade xestora remitiralle un requirimento á UDC para que a presente no prazo improrrogable de **quince días**.

A falla de xustificación da subvención neste prazo excepcional dará lugar á perda da subvención e demais responsabilidades previstas neste convenio e na lexislación aplicable ao respecto. Aínda así, a presentación da xustificación neste prazo adicional non eximirá á UDC da sanción que, de conformidade co disposto na Lei de subvencións e na ordenanza provincial de desenvolvemento que resulte aplicable, lle poida corresponder.

4.- O aboamento da subvención materializarase mediante ingreso na conta da entidade financeira indicada pola UDC.

VIII.- Acreditación do cumprimento das obrigas tributarias e coa Seguridade Social.

1.- A UDC deberá acreditar, con carácter previo á sinatura deste convenio e logo, con carácter previo ao pago da subvención, que se atopa ao día no cumprimento das obrigas tributarias coa Administración do Estado, coa Comunidade Autónoma e coa Seguridade Social; e para tal fin poderá autorizar á Deputación a que obteña telemáticamente os correspondentes certificados.

2.- A acreditación do cumprimento das obrigas tributarias coa Deputación Provincial determinarase de oficio por esta.

IX.- Destino e manexo dos fondos recibidos.

1.- A UDC destinará os fondos recibidos ao pagamento dos xustificantes de gasto presentados.

2.- Co fin de garantir un adecuado control da aplicación dos fondos, o pagamento deberá quedar acreditado documentalmente mediante a utilización de transferencia bancaria, tarxeta de débito ou crédito, cheque nominativo ou calquera outro medio que deixe constancia da data de pago e da identidade do perceptor; só excepcionalmente se poderá realizar o pago en metálico para gastos de ata 150 €, nos que non resulte posíbel a utilización dun dos medios anteriormente indicados.

3.- Sen prexuízo dos libros e rexistros contables que as normas xerais ou sectoriais lle poidan impor, a UDC deberá contar polo menos cun rexistro cronolóxico de cobros e pagamentos nos que se inclúan, entre outros, os relativos aos gastos xustificados e aos ingresos declarados con respecto a esta subvención.

X.- Control financeiro da Deputación e dos órganos de control externo.

1.- Consonte ao disposto nos artigos 44 e seguintes da Lei 38/2003, de 17 de novembro, xeral de subvencións, e nos artigos 41 e seguintes da Lei 9/2007, de 13 de xuño, de subvencións de Galicia, a UDC poderá ser escolleita pola Intervención provincial para a realización dun control financeiro sobre a subvención pagada, co fin de acreditar a efectiva aplicación dos fondos á finalidade para a que foron concedidos, o correcto financiamento da actividade e o cumprimento de todas as demais obrigas formais e materiais que lle impón o presente convenio de colaboración.

2.- Asemade, de acordo co previsto na Lei 6/1985, de 24 de xuño, do Consello de Contas de Galicia, a UDC queda sometida aos procedementos de fiscalización que leven a cabo o Consello de Contas de Galicia ou, no seu caso, segundo o previsto na Lei orgánica 2/1982, de 12 de maio, aos procedementos de axuízamento contable que poida incoar o Tribunal de Contas, e a calquera outro órgano de control, nacional ou europeo.

XI.- Reintegro, infraccións e sancións.

1.- O incumprimento dalgunha das cláusulas previstas no presente convenio de colaboración poderá dar lugar a obriga de reintegro parcial ou total dos fondos recibidos, así como ao pago dos xuros de demora que se perciban dende o día no que se realizou o pagamento ata o momento no que se acorde a procedencia do reintegro. O procedemento de reintegro iniciarase de oficio, na súa tramitación seguirase o disposto nos artigos 41 e seguintes da Lei 38/2003, de 17 de novembro, Xeral de subvencións e nos artigos 91 e seguintes do seu Regulamento (R.D. 887/2006, do 21 de xullo), dándolle en todo caso audiencia ao interesado.

2.- Sen prexuízo do anterior, dito incumprimento tamén poderá ser constitutivo dalgunha das infraccións tipificadas na Lei 38/2003, de 17 de novembro, ou na Lei 9/2007, de 13 de xuño, de subvencións de Galicia, séndolle de aplicación o cadro de sancións previstos nas normas citadas e na ordenanza provincial de desenvolvemento que resulte aplicable.

3.- Para os supostos de retraso na realización das actividades ou retraso na presentación da xustificación se estará ao disposto na ordenanza provincial de desenvolvemento que resulte aplicable,.

XII.- Incorporación ao rexistro público de subvencións e publicación da subvención concedida.

1.- No cumprimento do disposto no artigo 20.1 da Lei 38/2003, xeral de subvencións, e demais normativa de desenvolvemento, os datos da subvención concedida e a identificación da UDC serán remitidos á Intervención xeral do Estado, para que sexan incorporados á Base de Datos Nacional de Subvencións, coa exclusiva finalidade prevista no dito precepto e co debido respecto á protección dos datos de carácter persoal, segundo o previsto na Lei orgánica 3/2018, do 5 de decembro, de Protección de Datos Persoais e garantía dos dereitos dixitais.

2.- Asemade, no cumprimento do disposto no artigo 16.3 da Lei 9/2007, de 13 de xuño, de subvencións de Galicia, a Deputación remitalle a mesma información á Consellería de Economía y Facenda, co fin de que a incorpore ao rexistro público de axudas, subvencións e convenios da Comunidade Autónoma de Galicia.

3.- Segundo o previsto no artigo 18 da Lei 38/2003, de 17 de novembro, xeral de subvencións, a concesión da subvención á UDC será publicada no Boletín Oficial da Provincia da Coruña e na páxina web dacoruna.gal

4.- Un exemplar deste convenio, debidamente asinado, será incorporado ao rexistro de convenios que depende do Servizo de Patrimonio e Contratación da Deputación.

XIII.- Vixencia do convenio, prórroga ou modificación.

1.- O prazo de vixencia do presente convenio finalizará o **31 de maio de 2024** e terá efectos retroactivos, polo que as actividades contempladas nel poderán terse realizadas dende o 1 de xaneiro de 2023.

Esta vixencia queda subordinada á existencia do crédito adecuado e suficiente que para o Exercicio de 2024, autorice o correspondente Orzamento.

2.- Previa solicitude da UDC, realizada alomenos un mes antes do fin da vixencia, o convenio poderá ser prorrogado por acordo expreso de ambas as dúas partes, e previos os informes preceptivos da Unidade Xestora, do Servizo de Patrimonio e Contratación, da Secretaría e da Intervención da Deputación.

3.- Tamén por acordo expreso de ambas as dúas partes e por causa debidamente xustificada, e previos os mesmos informes indicados no apartado anterior, o convenio poderá ser obxecto de modificación.

XIV.- Natureza, interpretación, modificación e xurisdición competente.

1.- O presente convenio ten natureza administrativa e para resolver as dúbidas que xurdan na interpretación das súas cláusulas aplicaranse as disposicións contidas na Lei 38/2003, de 18 de novembro, xeral de subvencións, e na Lei 9/2007, de 13 de xuño, de subvencións de Galicia. Supletoriamente aplicárase a lexislación de contratos do sector público.

2.- A interpretación das dúbidas e lagoas que poidan xurdir na aplicación do presente convenio corresponderalle ao Presidente da Deputación, logo dos informes previos preceptivos da Unidade xestora, da Secretaría e da Intervención provincial.

3.- Corresponderalle aos órganos da xurisdición contencioso-administrativa, segundo a distribución de competencias prevista na Lei 29/1998, de 13 de xullo, reguladora de dita xurisdición, o coñecemento das cuestións litixiosas que poidan xurdir como consecuencia do presente convenio.

Faise constar que o presente convenio foi aprobado por ----

E en proba de conformidade asinan en exemplar cuadriplicado o presente convenio no lugar e data indicados no encabezamento."

E para que conste e sen prexuízo dos termos da aprobación da acta, segundo o disposto no artigo 206 do Regulamento de organización, funcionamento e réxime xurídico das Corporacións locais, expido a presente de orde e co visto e prace do Sr. Presidente na Coruña.

A secretaria xeral: Amparo Taboada Gil (asinado dixitalmente)

O presidente: Valentín González Formoso (asinado dixitalmente)